

**KI KHUBOR**

**KA**

**BALANG BASAH**

**No. 43**

**October 2015 – March 2016**

**2016**

## **KA 10 HUKUM U BLEI (EKSODOS 20:1-17)**

1. La khot – “Ka hukum bakynja Syiem.” – **Jakob 2:8**  
La khot – “Ka hukum U Trai ki paid.” – **Isaiah 5:24**
2. La kren da U Blei ha u lum Sinai – **Deut. 4:12 – 13; Ek. 31:18**
3. U Blei U la thoh ia ki – **Ek. 24:12; 31:18; 32:16**
4. Ia ki 10 hukum la khot – “Ka jutang jong U.” – **Deut. 4:13; Salm 89:34; Hebru 8:10**
5. La buh ia ki hapoh ka synduk ka jutang – **Ek 40:20; Deut. 10:1-5; Hebru 9:3-4; Jingpynpaw 11:19**
6. Ki 10 hukum U Blei kiba janai bad kiba hok – **Salm 19:7; Salm 119:172; Rom 7:12**
7. La pynskhem ia ki junom junom – **Salm 111:7 – 8.**
8. U Jisu Um shyem la wan ia kaban pyndam noh ia ka hukum (jong U) ...hynrei ia kaban pynskhem – **Math 5:17**
9. Ka la pynsgewbha ia U Trai...ban pynkhray ia ka hukum bad ban pyndonburom ia ka – **Isaiah 42:21**
10. Uba stad ha ka dohnud un pdiang ia ki hukum – **Proberb 10:8**

## **KI HUKUM U MOSES (Deuteronomi 31:24 – 26)**

1. La khot – “Ki hukum kaba ha ki niam ki rukom.” – **Ephesos 2:15**
2. La kren da u Moses – **Lebitikos 1:1 – 3**
3. U Moses U la thoh ia ki ha ka kitab – **2 Khronikl 35:12; Deut. 31:24 – 26**
4. La khot – “Ka kot jingkular ba la thoh ha ki niam ki rukom” – **Kolossai 2:14**
5. La buh ia ki ha krung ka synduk ka jutang – **Deuteronomi 31:24 – 26**
6. Kim long kiba janai – “Namar ka bym lah ia ka snam ki masi bad ki blang ban kit ia ki pop” – **Hebru 7:18 – 19; 10:4**
7. La lah pyndam noh ia ka ...U (Jisu) da sahnar ia ka ha ka diengphna – **Kolossai 2:14**
8. U (Jisu) la pynduh ha ka doh jong U ...**Eph. 2:15**
9. La ai ia ka hadien namar ki jingpalat, haduh ban da wan uta u symbai (U Jisu) ...**Galatia 3:19**
10. Kiba long ka syrngiew ia kiei kiei kiban sa wan; hynrei ka met ka long ka jong U Khrist – **Kol. 2:17; Ioan. 1:29**

## KA BAIBL PYRSHAH KI JINGHIKAI KA ROME

1. Ka Baibl ka hikai ba ngim dei ban mane ia ki durblei (Ek. 20:4, 5). Ka Rome ka ong, ngi dei ban mane dem ia ki durblei.
2. Ka Baibl ka hikai “ba baroh ki la leh pop” (Rom 3:23), lait noh tang U Jisu. Ka Rome ka hikai ba ka Mary ka kmie U Jisu kam ju leh pop.
3. Ka Baibl ka ong, U Khrist U long U Nongiasaid ne U ksiang hapdeng U Blei bad ki briew (1 Thimothi 2:5). Ka Rome ka ong ba ka Mary ruh ka long ka nongiasaid ryngkat bad U Khrist.
4. Ka Baibl ka hikai ba U Khrist U la knia ialade tang shisien ha ka diengphna na bynta baroh (Heb. 7:27). Ka Rome ka hikai ba u lyngdoh Roman u knia ia U Khrist ha ka duwan man ka sien ba u leh ia ka Mass.
5. Ka Baibl ka hikai ba ki Khristan kiba shisha ki long ki riewkhuid bad ki lyngdoh (Eph. 1:1, I Pet. 2:9). Ka Rome ka ong, dei tang ki lyngdoh niam kiba long ki riewkhuid bad ki lyngdoh bashisha.
6. Ka Baibl ka hikai ba ki Khristan ki donkam ban tip bad ki don ka jingim bymjukut haba ki ngeit ha U Jisu U Khun U Blei (I Ioan. 5:13). Ka Rome ka ong ba ki Khristan kim dei ban tip ba ki don ia ka jingim bymjukut.
7. Ka Baibl ka hikai ba ngim dei ban khot ia uno uno u briew u kpa jong ngi, naba ngi don tang uwei u kpa jong ngi, uba ha bneng (Math. 23:9). Ka Rome ka hikai ba ngi lah ban khot ia u lyngdoh Roman u kpa jong ngi.
8. Ka Baibl ka hikai haba ngi duwai ngim dei ban bun ktien bieit kum ki Jentil (Math. 6:7). Ka Rome ka hikai, phi lah ban bun ktien bieit haba phi duwai, da kaba ong bunsien bunsien, khublei Mary, bad u kpa jong ngi.
9. Ka Baibl ka hikai ba ngi dei ba phla ia ki pop jong ngi ha U Blei (I Ioan 1:9). Ka Rome ka hikai, phi donkam ban phla ia ki pop jong phi ha u lyngdoh niam.
10. Ka Baibl ka hikai, shuwa ban pynbaptis iano iano, dei ban da hikai shuwa (Math. 28:19, 20). Ka Rome ka ong, dei ban pynbaptis ia ki khyllung ba dang rit, namar lada ki iap shuwa ba kin iohpdang ia ka jingpynbaptis, kin poi sha ka dujok ding.
11. Ki jinghikai shaphang: Ka Purgatory, Limbo bad duwai ha kiba la iap, phim lah ban shem ha ka Baibl.

- Dough Batchelor

## KA JINGBISHAR BNIAH IA U MRAD KHLAW

### Jinglamphrang

Ki la don bun ki jingjia, kiba bun na ngi ngim tip bad ngim bna kiba don jingiadei bad ki jingiathuhlypa jong ka Baibl. Bad katba ngi dang puson ia kiei kiei kiba dang shu jia shen, ka la pynlyngngoh jur ia ngi haba ngi la ioh khubor ba u pope Francis u la bun kam haduh katta ha kaba pyrshang ban pyniatylli lang kawei ia ki balang Khristan bad ruh ia ki jaid niam bapher bapher. Bad u la iasyllok ruh bad ki nongsynshar pyrthei ba kin ialong shitylli – bad ngim tip shano kane kan ialam. Hynrei kane baroh ka long ban pyndep ia ka jingiathuhlypa jong ka Baibl.

To ngin iabishar bniah haduh katno ki jingiathuhlypa jong ka Baibl ki long kiba shisha. Da ki spah spah snem, ki Protestant baroh ki iamynjur ba “ka reng kaba rit” ia kaba la iathuhlypa da u Daniel (Daniel 7:8) bad ruh “u nongialeh pyrshah ia U Khrist” ba la kren ha ka kitab Jingpynpaw 13:1-10, la pynithuh ba ka dei ka seng niam jong u pope (Papacy). Ban shu ai ki nuksa shim ia ki nongpynthymmai niam kum kine harum:

U Martin Luther (1483 – 1546), u nongseng ka balang Lutheran, u don ia kane ban ong shaphang ka bor u pope –

“Ngi don ka jingngait kaba skhem ba ka Papacy  
Ka long ka jaka shong jong u nongialeh pyrshah ia U Khrist.”

Ngin ia peit ia uwei na ki nongseng ia ka balang Presbyterian u John Calvin (1509 – 1564), u don ia kane ban ong: “Nga len ia u (pope) ba u dei u nongmih bujli ha ka jaka U Khrist, uba namar ba u la bitar, bad u la leh bein ia ka gospel, kaba pyni ba da ka jingleh jong u, ba u dei u nongialeh pyrshah ia U Khrist.

Phai pat sha u nongseng ka balang Methodist, u John Wesley (1703 – 1791) u don kumne ban ong: “U dei ma u (u pope)...uba la kyntiew ia lade halor baroh ba la khot Blei, lane ba ju mane...u shim ha lade ia ka bor ba hakhlieh tam bad ia ka burom ba hajrong tam...u shim ha lade ia ki hok kiba dei ki jong U Blei.” – Albert Close, *Anti Christ and His Ten Kingdoms*, 1917, pg 110. Ki don shuh shuh sa kiwei de, kiba ngeit ba ka “Papacy” ka dei kata ka bor niam kaba ialeh pyrshah ia U Khrist, kum ki jong u Wycliffe, u Tyndale, u Cranmer, u John Bunyan, ki nongpyntylla ia ka King James Bible, bad ki brierw kiba la shon ia ka Westminster and Baptist confessions of faith, u Sir Isaac Newton, u George Whitfield, u Jonathan Edwards, u Charles Spurgeon...kine baroh ki iaphla ba ka Papacy, ka dei kata ka bor kaba ialeh pyrshah ia U Khrist.

Hynrei katno ka pher ka jingsngew ha ka balang Khristan ki sngi ba mynta. Khamtam ki paid Khristan Evangelical, ka i kumba ki kdup da ka jingieit ia ka balang Roman Catholic, bad ki ong, “ngi ialong kawei.” Kim sngewthuh ba ka don ka jingiapher bakhraw hapdeng ka jingngait Khristan Protestant bad jingngait Roman Catholic, ki la klet ia la ka jong ka tynrai. Bad kane ka long kaba donkam ba ngin tip, namar la iathuhlypa kumne ha ka Jingpynpaw 13:15-17, “Bad la ai bor ha u (bor Protestant America) ban ai ka mynsiem ha kata ka dur (bor synshar) uta u mrad khlaw, ba kata ka dur (bor synshar) uta u mrad khlaw kan da ioh kren (thaw ain) ruh, bad ba kan

ioh pynlong (pynbor) ba kat kiban ym mane dem ia kata ka dur (bor synshar) uta u mrad khlaw yn pyniap noh ia ki” (13:15).

Kat kum ka jingiathuhlypa, ka pyrthei baroh kawei kan pyndem ia lade ha ka jingmane bakhyllah (Jingpynpaw 13:4, 8). Ha kata ka por yn sa mih tang artylli ki rukom mane – ka jingmane ia U Blei Uba shisha bad ka jingmane ia u mrad khlaw.

“Bad u la pynlong ia ki baroh, ia ki barit barain ruh bad ki bakhraw batri, ia kiba riewspah ruh bad kiba duk, ia kiba laitluid bad ki mraw, ba yn buh ha ki ia ka dak halor ka kti kamon jong ki, lane halor ki shyllangmat jong ki; 17, bad ba uno uno ruh un ym lah ban thied lane ban die, hynrei tang uta uba don kata ka dak, kata ka kyrteng hi uta u mrad khlaw kein, lane kata ka jingkhein ka kyrteng jong u” (13:16-17).

Kane ka jingiathuhlypa ka kren shaphang ka ioh ka kot namar ka bor jong u mrad khlaw kan leh don bor, wat ban pyniaid ruh ia ka die ka thied bad ka khaii pateng.

Bun ki briew kim tip ba ka don ka jingiapher kaba khraw hapteng ka jingngeit Khristan bashisha bad ka jingngeit Roman Catholic – Ban shu ai nuksa: Ka Baibl ka hikai ba ngim dei ban duwai ha ki dur bleithaw, bad ba ngim dei ruh ban iaroh ia ki dur briew ba shna da ki kti (statues), ka balang Catholic ka pynshlur ia kane. Ka Mary kam dei ka blei ba ngin duwai ha ka, ym don hangno hangno ba la thoh ha ka Baibl ba ngi dei ban duwai ha ki riewkhuid ba la iap, lane ba ki riewkhuid ba la iap ki per ha suin bad ba ngi lah ban iakren bad ki. Bad ka jingong, ba ngi dei ban phla ia ki pop jong ngi ha u lyngdoh niam lane ban khot ia u lyngdoh, u kpa bakhuid jong ngi, la khang pyrshah ha ka Baibl. Ngim len ba ki don ki briew kiba riewblei hapteng ki riewngeit Catholic, bad ngi khmih lynti ruh ban iakynduh ia ki ha bneng, ngi kwah ban pynshai ia kata, ngi khmih lynti ruh ban iohi ia ka mother Teresa ha ka hima jong U Blei. Ngim kren shaphang ki briew, hynrei ngi kren shaphang ka seng niam ka bym bud lut ia ki jinghikai bashisha jong ka Baibl. Ki Khristan bashisha ki hap ban jied iano kin kohnguh, kin kohnguh ia u mrad khlaw, ne kohnguh ia U Khrist bad ia ka Baibl.

Ngin iapeit khyndiat ia ki katto katne ki jingjia kiba don jingiadei bad u pope Francis bad ka balang jong u, bad peit lada kam pynkhih jingmut ia phi ban tip ba ngi la ia im ha ki sngi kiba khadduh.

1. Ha u January 21, 2014, u pope Francis u la ioh ia ka lad ban kren ha ka jingialang ki Khristan Evangelical. U la khot ia ka jingialong shitylli hapteng ki Protestant bad ki Catholic. Ha shuwa ba u pope un kren, u paralok jong u, u Tony Palmer u bishop ka balang Anglican u la kren lamphang, u la ong haduh laisien laiwat ba ka jingpynthymmai niam Protestant ka la kut ka la wai bad u ong, lehse ngi baroh mynta ngi la ialong Catholic.
2. Ha u March 13, 2014 la khot sngewbha ia u pope Francis ba un kren ha ka dorbar ka ri America ha ka jingiakynduh lang baroh ar ki ing (Senate & House of Representatives).

3. Ha u March 27, 2014, u President Obama ka ri America, u la leit iakynduh ia u pope Francis ha nongbah Vatican, bad u la pynlut por shi kynta ban iakren bad u pope. Kane ka pynkynmaw ia ngi ia ka jingiathuhlypa shaphang ka ri America, ba ka dei uta u mrad khlaw baar, uban thaw dur ia u mrad khlaw banyngkong, bad uban “pynbor ia kata ka khyndew...ba kin ia mane dem ia uta u mrad khlaw banyngkong ia uba la pynkhiah ia kata ka jingmong iap jong u” (Jingpynpaw 13:12).
4. Ha u April 27, 2014 u pope Francis u la pynbna ba un kyntiew pyndon burom ia ki arngut ki pope kiba la iap, ia u pope John XXIII, bad u pope John Paul II. U la kyntiew ia ki sha ka jinglong riewkhuid ha kaba lah ban duwai ha ki. Haden ka jinglehniam u pope Francis u la leit ban kdup ia u pope Benedict XVI. Ngim donkam ban duwai ha ki pope ba la iap, ban ioh ia ka jingshah shkor jong U Blei. Ngi lah ban leit beit (direct) sha U Khrist. U Paul u ong, “Namar don uwei U Blei, bad uwei u ksiang ruh hapdeng U Blei bad ki briew, U Khrist Jisu” (1 Tim. 2:5).
5. Ha u May 9, 2014 u pope Francis u la aibuit ia ki nongialam jong ka UNO ha ka ioh ka kot (economics). U la kyntu jur ba ia ka spah balalum, dei ban iasam lem bad kiba duk. Hangne phi don ia u pope, u dei u nongialam niam bad ki heh ki hain ka UNO ki la leit khnang sha Vatican ban ia kynduh ia u pope bad ban ioh jinghikai kumno ban pyndonkam ia ka spah. Peit ia ka bor jong u pope ba ki nongialam ka UNO ki leit ban iakynduh ia u bad pan buit kumno ban pynroi ia ka ioh ka kot. Hato ym shym la iathuhlypa ha ka Jingpynpaw 13 ba ka por kan sa poi, haba ka bor jong u mrad khlaw kan ai hukum mano ba lah ban thied bad ban die.
6. Ha u May 25, 2014 u pope Francis ha ka sien banyngkong u la leit sha Palestine (Middle East) bad u la kyntu ba ka dei ban don ka jingiashong suk bad ban ym ialeh thma, u ong: “Hangne ka long ka jaka ba la kha ia u syiem jong ka jingsuk.” U ong, “Nga khot sngewbha ia phi u President Mahmoud Abbas ki nong Palestine bad u President Shimon Peres ki Israel ban wan iasoh bad nga ha ka jingduwai ban pan na U Blei ia ka jingsuk. Nga tyrwa ia ka ing jong nga ha Vatican ban pynlong ia ka jingiaseng jingduwai.” Kane ka la long ka sien banyngkong ba u pope u la leit sha Middle East, ka ri bakhuid jong ki Jiw, ki Muslim, ki Prostestant bad ki Catholic. Kane ka long kaba donkam, kaba thew ba u pope u la kdup lang baroh ki nongialam niam bad ba ma u u long u nongialam ba hakhlieh tam. Kane ka pynkynmaw ia ngi ia kaei ba u Paul u la kren ha ka 2 Thessaloni 2:3-4, “...bad ba yn ioh pynpaw noh ia uta u briew jong ka pop, u khun jong ka jingjot; 4, uta uba ialeh pyrshah bad uba pynsarong ia lade pyrshah ia baroh ba la khot Blei lane ba ju mane; kat haduh ba u shong ha ka templ U Blei, u da leh Blei ialade.”
7. Ha u June 1, 2014 u pope u la leit ban iashim bynta ha ka jingialang ka kynhun ki charismatic ha ka sien banyngkong. U la ioh lad ban kren ha ki 53,000 ngut ki charismatic kiba la pynlong jingiaseng ha ka Olympic stadium ha Rome. Bad katba u pope u dang dem khohsiew ha madan, baroh ki la iaduwai na bynta u pope ha ki thylliej bym tip. La pynpaw kumba u pope bad ka balang Catholic ki kyrshan ia ka jinghikai ban kren ha ki thylliej bym tip.  
U pope u la pynpaw ba mynshwa um da sngewtynnad ia ka kynhun charismatic, hynrei mynta u la kham sngewtynnad.

8. Ha u June 5, 2014 u Joel Osteen, u pastor ka balang Houston Lakewood, USA, u la leit ban iakynduh ia u pope Francis ha Vatican. U la ong, ba ka la long ka burom bakhrav ban long kum u nongmihkhmat jong ki pastor ka ri America haba u la iakynduh bad u pontiff. U ong ba u pope u long uba sngewtynnad, uba leh paralok bad uba dap da ka jingkmn.  
Ka khubor na Washington ka ong: Ka kynhun ki nongialam sain pyrthei bad nongialam niam na America ki la leit ban iakynduh ia u pope ha Vatican, ban iasohlang ha ka jingdwai. Ki la iakren ia kawei ka mat ba kongsan: Hato ngi lah ban iapoi lang sha kajuh ka jingiasngewthuh jingmut hagdeng jong ngi ban pyniaid shaphrang ia ka jingim bad jingshakri jong U Jisu. Sngewtynnad ban iapoi sha ka jingiasngewthuh jingmut, hynrei ka lah pynban ban ialam sha ka jingiatylli ba ma bad ba mynsaw.
9. Ha u June 8, 2014, u pope u la pyniasoh ialade bad ka kam ban iakren iasuk ha Palestine (Middle East). Ha kaba sdang u snem 2014, ka la don ka jingialeh thma kaba jur hagdeng ki Israel bad ki nong Palestine. Namarkata, ka long kaba donkam ban iakren iasuk. U la ioh ban kren ia u president ki Palestinian, u Mahmoud Abbas, bad ruh ia u president ki Israel, u Shimon Peres. U pope u la khot sngewbha ia ki ban leit sha Vatican, u ong, “Wan sha ka headquarter jong ngi, ngin ia duwai na ka bynta ka jingsuk, ngin iakren shaphang ka jingsuk.” Kawei kaei kaei kaba sngewphylla ha ka jingiakynduh lang ha Vatican, ha ka sien banyngkong ia ka Quran ki Muslim la pule, bad la duwai ruh ia ka jingduwai Muslim.  
Haba pyrkhath shaphang kane ka jinghren iasuk, ka pynkynmaw ia ngi ia kaei ba u Paul u la kren ha ka shithi 1 Thessaloni 5:1-3, “Namar phi hi phi tip, ba kata ka sngi U Trai kan wan kumjuh kum u nongtuh mynmiet. 3, katba ki dang ong, ka jingsuk bad ka jingskhem bha, ynda kumta ka jingjot bakyndit kyndit kan ngat ha ki...bad kin ym ioh lait shuh da lei lei.”
10. Ha u July 7, 2014 u pope u la iakynduh ia ki evangelist na America ha nongbah Vatican. Hagdeng ka kynhun ki don arkyhun ki nongialap na Texas. Bad la ialam ia ki da u Tony Palmer u bishop ka balang Anglican. U la ialam khnang ia kane ka kynhun ki evangelical sha Rome ban iakynduh ia u pope Francis. Ka jingialang ka la neh la jan 3 kynta bad ka kynthup ruh ia ka jingiabam lang. Ha kane ka jingialang la iarai bad iasoi ia ka dular ban iatylli lang kawei ha ka jingngeit na bynta ban ialap ia ka gospel. Bad ia kane ka jingiateh soskular ban ialong kawei ha ka jingngeit...la iasoi ha ka lyngkhuh snem ba 500 jong ka jingialeh pyrshah u Martin Luther ia ka balang Roman Catholic.
11. Ha u July 22, 2014 u pope u la thung ia ka dorbar ka ban pyniaid shaphrang ia ka jingiatylli ki balang Khristan shityllup ka pyrthei. U pope u kwah ba baroh ki balang kin ialong shitylli bad ithuh ia u pope kum u nongialam.
12. Ha u August 22, 2014 u pope Francis u ai jingkyrshan ba dei ban leh da ka bor ia ki ISIS ha Iraq, khnang ban pynsangeh ia ki na kaba pyniap ia ki Khristan...hynrei u ong ba ki ri baroh ki dei ban iatylli lang kawei – bad ym tang kawei ka ri. Baroh ki ri ki dei ban iatreilang kumno ban tuklar da kaba leh da ka bor ia ki ISIS.

13. Ha u September 4, 2014 ia u Pope la tyrwa ba un long u khlieh nongialam jong ka seng “United Religions Organization.” U shalom Peres, u President ka Israel, u la kyntiew ia u pope kum u briew uba donkam tam na bynta ban wallam ia ka jingsuk ha ka pyrthei. U Shalom Peres u la ong ba u pope u long u nongiasaid bakhlain bor na bynta ban wallam jingsuk, ban ia ka UNO.

Lada kata kam pat biang, u Jerry White, u Assistant Secretary of State ka America, u la khot ba dei ban don ka jingiateh jutung jong baroh ki niam ha ka pyrthei bad ba u pope u dei ban long kum u khlieh nongialam.

Ka nongbishar bapawnam ka America, ka Jeanine ha ka Fox News ka la pynbna ba u Pope u dei ma u uban weng ia ka jingialeh thma ha Middle East. Ka bteng ban ong, ia ki Khristan ha Middle East la rai ban pyniap ia ki na bynta ka jingngeit jong ki, bad ym don mano mano ban ialeh na bynta jong ki. Ia ki Khristan la pynbor ba kin iaphet krad na la ka jong ka ri...Te mano ban ialeh na bynta jong ki. Ia ki Khristan la pyniap bad ia ki ing mane la thang, bad ia ki Khristan la pynbor ba kin iaphet krad na la ka jong ka ri...Te mano kein ban iada ia ki Khristan? Mano? U nongialam jong ka balang Catholic, u pope, u briew uba long u nongsharai jong kiba iaineh.

Baroh ka pyrthei mynta ki iaphai khmat sha u pope, kum uta uba lah ban wallam jingsuk ha ka pyrthei bad ki phai noh ia la ki khmat na U Blei, uba tang ma U Uba lah ban ai ia ka jingsuk kaba shisha.

- *Dough Batchelor*



## KA JUBAB IA KA KHLEM POI PYRKHAT

Ha ka No. 42 jong ka **Ki Khubor Ka Balang Basah** ka sla 25, mih kato ka jingpyrkhat “khlem poi pyrkhat.” Iba kylli nyngkong eh dei i Bah Lamurong na Thangbuli, iba ar i Pr. I R Wann, iba lai i Kong Rosila na Mawkbu bad iba saw pat i Bah John na Lapalang. Tharai yn dang don kiwei kiwei ki riew pyrkhat ki ban dang kylli.

Phi lah ban pyrkhat ia nga kum u riew wad dong, nga pdiang sngewbha ia kata. Hynrei pyrkhat pat hato ka long kaba dei? Ha kato ka sla 25 la thoh don khyndiat ki balang, kata ka mut ym baroh.

Don ki balang kiba pyrkhat na ka bynta ki khun samla bad ki khun rit dei ban leh ha ki por Khristmas. Ka jingthmu kaba bha. Ki ia pynlong ka prokram kyrpang. Don kiba pynlong ha ka miet sngi Pynkhreh, kiwei pat ha ka bym dei ka kynta jong ka Sabbaton. Ki jingleh ki dei kumjuh. Eksodos 20, 4, 5 ka ong men ym thaw bleithaw, wat dem ne mane ia ki. Ha ka prokram kim thaw blei thaw, hynrei ki wan rah da iba la dep thaw u dkhar, i khun bynriew. Ki pynthiah ha i jaka ba la shna kyrpang ba la siang da u phlang. Ki buh ki briew Mari-Joseph, nangta ki nongab langbrot ki wan bad mane ia i khun bynriew plastic lane khun bynriew jain. Nangta sa 3 ngut ki riew stad na ri mihngi. Ki wan bad mane ia i khun bynriew. Balei 3 ngut ki riew stad? Namar ba 3 tylli ki jingai sngewbha? 2 ngut ki lah ban ai 3 tylli lane 5 ngut ki lah ban ai 3 tylli. Ngam shem ba ka Baibl ka ong 3 ngut ki riewstad.

Ka jingpynkhein ia ka hukum kaba ong wat thaw bleithaw lane wat mane ia ki. La leh da kaba khlem poi pyrkhat. Don pat kiba pynlong ia kum kine ki prokram ha ka miet sngi Pynkhreh. Ki leh ia kito ki juh ki prokram, namar ka Baibl ka kren shaphang u khlur uba ialam lynti ia ki riewstad, ki thang bad pynher ia kito ki jingpynbthei bomb ba ju leh ki dkhar ha ka por puja jong ki, kito ki jingpynbthei ki her sha suin, mih ki khlur. Ki khun samla, ki khyannah ki ia kmen ia pyrta sngewbha ha ka kynta ba la dei ka Sabbaton. Kane dei ka jingpynkhein ia ka hukum kaba ong, “Kynmaw ia ka Sabbaton ban rakhe khuid ia ka.”

Nga tharai U Blei U pdiang ia kine ki jingleh namar ngi leh khlem poi pyrkhat. Ne tip kumno?

*H Nongkhlaw*

## KA REPORT NA KHASI WEST CIRCLE

### **Jingpynbaptis**

1. Ha ka 13/06/15 ha Lumpyngngad jan Riango la pynbaptis 4 ngut kiba wan na ka balang Presbyterian.
2. 11/07/15 ha Nongstoin la pynbaptis 4 ngut kiba dei na Riango bad Lumpyngngad.
3. 15/08/15 ha Lyngiong la pynbaptis 7 ngut.
4. 7/11/15 ha Mawlieh jan Rambrai la pynbaptis 4 ngut da i Pastor S Hynniewta, 3 ngut na Mawlieh kiba dei shi kmie shi khun na ka balang Presbyterian, iwei na Lumpynad jan Riango kaba dei ka kmie ieit jong kiba la pynbaptis kham mynshwa. Bad la don shwa da ka jingiasengialap naduh ka 5 – 7 November 2015 da I Pastor S Hynniewta, la wan kyrshan lang da ki Evangelist W B Hynniewta, Albert Skhemlon, L L Wahlang, W Nongkhlaw, Dasking Mawsor, Pr. K Syiemlieh.
5. 14/11/15 ha Nongstoin la pynbaptis iwei i samla kynthei bad na Riango, ka jingshisha la dei ban pynbaptis lang ba kiwei kiba na Riango hynrei namar ka jingpyrshah na ka liang kiba ha ing i la kwah ban pynbaptis noh khlam klo. To U Blei Un kyrkhu ia ka jingshlur jong i ban bud ia U Trai wat hapdeng ki jingpyrshah na ing.

### **Kiba la khlad Noh**

1. I Heprit Jasmin Mawsor khun jong i Kong Ailaklin Mawsor bad bah Makarius, ba la kha ha ka 20/10/2008 i la khlad noh ha ka 12/07/2015 la tep ha 14/07/15 ha Pyndengmawlieh.
2. I Meieit Proslina L Nongum iba la dap kumba 70 snem ei ei ka rta i la khlad noh ha ka 25/09/15 bad la tep ha ka 27/09/15 ha lum jingtep ka balang ha Nongstoin. I dei i kmie jong i Kong Ailin L Nongum bad Bah Morningstar L Nongum kiba long ki parabangeit jong ngi. Ka long ka jingduh ia ka ing bad ia ka balang.
3. I Heprit Amanda Mawsor khun jong i Kong Kwildaris Mawsor ba la kha ha ka 7/10/14 i la khlad noh ha ka 26/09/15 la tep ha ka 28/09/15 ha Pyndengmawlieh.
4. I Mei ieit Shurila Nongkhlaw kmie jong i Kong Shereen Nongkhlaw i la khlad noh ha ka 11/10/15 ha u Lum jingtep ka Balang Myllem la kha ia i ha u snem 1932 bad i la dep kumba 83 snem ka rta ei.

Para bangeit ba ieit, kane ka article kaba nga la buh ha ka Khubor Balang Basah ka dei ka jingthoh kaba nga la sot bad pynkylla ktien beit beit na ka Elder's Digest; July / September 2015. Nga sngew ba ka long kaba donkam eh ba ngan ia sam lem bad phi baroh. Ka subject ka long kane harum:

## **Ka Balang bad ki nongwoh daw jong ka**

Ngi ia im mynta ha ki sngi kiba khadduh jong ka histori u bynriew, bad u soitan u don ia ka jingbitar kaba khraw eh namar u la tip ba u don tang khyndiat eh ka por( Jingpynpaw 12:12). Ha ka thma jong u pyrshah ia ki briew jong ka balang basah jong U Blei “kiba sumar ia ki hukum jong U Blei bad kiba bat ia ka jingphla U Jisu” (dk 17). U soitan u pyndonkam da ki atiar briew kiba napdeng jong ki briew jong U Blei hi kum ki khnam kiba mehding (Mat 12:24-30). Kiba kam ialade ba ki dei ki briew ki jong U Blei bad kiba pynpaw da ka jingshithem kaba khraw ha ka jingshisha, kito ki jait briew ki long ruh kiba khlain ha kaban wanrah sha poh ka balang ia ki juh ki jait bynriew kiba kum ma ki kiba don ia ka mynsiem jingialeh pyrshah ia kiba la batai ruh ba ki long “ki nongpynrem ia la ki para” (Jinpynpaw 12:10).

Da kaba maham ia ngi ba ngim dei ban bishar ia ka jingthmu ba shapoh jong ki briew (Mat 7:1), U Khrist ruh u pynshlur ia ngi ba ngi dei ban bishar bad pynshongdor ia ka jinglong jong ki, kiba la I kum ki nongrah ia ka jingshisha, khnang ba ngin ym shah ialam bakla da ki (Mat 7:15-23). Ha ka kot *The Remnant Church*, ka Ellen G. White ka la maham ia ngi baroh ba ngi dei ban iada ia lade na ki nongpynrem ia ka balang. Te namar kata ka daw ia nga la pynthikna ba ngi dei ban da husiar bad peit khmih bha ia ki nongwad daw, ia ka jinglong bad ia ka buit bymman jong ki khnang ba kin ym ioh ban ialam bakla lane pynpait pynpra ia ki dkhot jong ka balang ba shisha jong U Blei.

Naduh basdang shaduh bakut jong kane ka jingthoh, ngan pyndonkam ia kane ka ktien ‘nongwad daw’ ym sha kito kiba kyrshan bad kyntiew ia ka balang hynrei sha kito kiba don barabor ia ka jinglong ba iai pyrshah, ban iai kynnoh bad pynrem ia ka balang.

### **Ka jinglong jong ki nongwad daw**

Katto katne ki nongwad daw pyrshah ia ka balang, ha ka jingshisha ki im beit bad kim don jingeh ha ki jingsngew ba shimet jong ki. Namar kata ka long kaba bakla ban khein ba baroh ki nongwad daw ki long ki juh. Hynrei bun na pdeng jong ki kiba la pynpaw ia ka jinglong jong ki ha kine ki rukom harum.

**Ka mynsiem pynrem briew.** Ki nongwad daw bunsiem kim ju sngewhun tang ha ka ban ia tainia lane ia kren shaphang ki buit bad ki jingthmu; hynrei ki kwah ba kiwei kin sngap ia ki, da kaba ki pynrem ia ki briew kiba trei shitom jong ka balang ban pynpoh bad pynhiar dor ia ki tang da ki jingkren sniew suda. Da kita ki buit shyrkhei ban iada ia lade, ki khring ia ki jingmut jong ki briew da kaba kynnoh sniew bad kren siar ia ki jingbakla jong kiwei pat ha ka jaka ban kren shaphang ia la ki jong ki jingbakla. Ha kane ka rukom, ki pyndonkam da ki jingshukor bad jinglamler kiba bunsiem kito kiba sngap kim lah ban pyniapher la ka long kaba dei ne kaba lait.

**Ki jingsngewdukha ba shimet shimet.** Bun na ki nongwad daw ki dei ruh kito ki briew kiba sngewdukha, sngewbitar namar ba ia ki ym shym la thung ha ki kyrdan nongialam, lane ki bym ioh ia ka jingiaroh lane ka jingithuh jong u paitbah, lane ruh kito ki briew kiba la duh noh ia ka

kyrdan ha ka imlang sahlang. Kim lah shah ia kata ka jingsngewsih jong ka jingduh jong ki, ki kynnoh ia kiwei pat khnang ban pyllait ia kata ka jingkhthang kaba ki ia shem.

**Kiba don jingeh ha Ing ha sem bad ha ka jinglong ba kynja mynsiem.** Bun na ki nongwad daw ki dei kito kiba la shah ieh noh ha ki lok ki tnga jong ki da kaba ki shah klim lane da kaba ia khlad lok (la ka long da ka jingiap lane ka jingbym ia sngewthuh shuh). Khlem don ka longing longsem kaba khlain, kine ki briew ki pyrshang ban pynkulmar ia ka imlang sahlang bad khamtam ia ka balang.

**Kiba shem jingeh ha ka pisa pelain.** Katto katne na ki nongwad daw kiba shyrkhei ki dei kito kiba biang kiba bit shipor ha ka jingioh jingkot jong ki hynrei kiba kylla duk kynsan. Ha kiba bun ki rukom kine ki briew ki kylla long ki bym iaineh ha ka jingngeit bad haba ai ia kawei na kaba shiphew bad ki jingkynshew. Ki pyrshang ban kynnoh ia ba dei ki nongialam balang kiba bam sap bad kiba pyndonkam bakla ia ki pisa. Don ruh ki nongwad daw ki pyndon kam ia ka pisa jong ka balang na ka bynta ka trei ka ktah jong ki.

**Ki jingsngew shaphang ia lade.** Katto katne ki briew kiba la shah leh be-ain ha ki por jinglong khynnah jong ki, lane kiba don ka jingduna ha ki dkhot met lane jingmut jingpyrkhat jong ki, ki khmih lynti kliaw tang kumno ban ioh lad bad daw khnang ban kyrshan ia ki apot kiba ki la mad jong ka jingsngew poh ia lade. Da ka jingbymlah ban pynpaw babha ia lade hapdeng ka balang, ki pyndonkam ia 'ka jingwad daw' kum ka lynti ban siewkylliang ia ki jingsngewsih jong ki. Ym shah ban ialap, lane shim bynta ha ingmane, ki shong sha dien duh, bad ki woh daw woh dong ia u nongialap.

**Ka jingkhwan / jingieit tang lade.** La jan baroh ki nongwad daw, ki dei briew kiba sarong khyllaw shaphang lade, kiba niew ia lade ki nuksa kiba bha tam na ka bynta ka jinglong ba kynja mynsiem jong kiwei. Ia kito kiba ia mynjour bad ki jingmut jong ki, ki niew kum ki khristan kiba shisha, hynrei ia kito kiba pyrshah ia ka jingmut jong ki, la niew ba ki long ki 'nongwad daw bad ki nongkrenbein blei'. Ki niew ba ki jingpyrkhat jong ki ki long kiba bha tam eh bad ki jingbishar jong ki ki long kiba dei suda.

**Ka jingsngew 'ma nga' bad ka jingsngew biang lade.** Ka jingsngew shimet jong u 'nongwad daw' ka pynmih ha ki ia ka jingsngew 'manga' bad jingsngew biang tang lade, kaba pynjngai ia ki na ki jingia pyrkhat lang jong ka balang. Ha ki, ka jingsngew stad pyrkhat ba shimet ka kham khraw bad kham donkam ia ka jingiasyllok jong ki wei pat ki parabangeit. Bunsien ki ju niew ia kito kibym ia mynjour bad ki, kum kiba poh bad kiba duna pyrkhat pyrdain bad kiba kham bieje.

**Ka jingbymeit lane duna ha ki jingshemphang.** Bun na ki nongwad daw jong ka balang ki don ia ki jingshitom jong ka jingbymlah ban pdiang ia ka buit kiwei pat ki briew. Kim ju lah ban teh lakam ia ka jingbitar jong ki pyrshah ia kito kibym mynjour bad ki jingai jingmut jong ki. Ki ju niew ia baroh kito kiba pyrshah ia ki kum ki nongshun kiba dei ban ialeh pyrshah ha ka kyrteng jong U Blei.

**Ka jingkwah ban pynlong kam paitbah.** Ka jinglong briew hi ka don ia kata ka jingkwah ban shu pynlong paitbah, hynrei ki nongwad daw ki dei kiba stad bha ha kane ka liang. Ki shim ia ka jingbakla jong u nongialam balang bad ki pynbna pyrthei ba ka dei ka jingbakla jong ka balang hi baroh kawei. Dei ma ki kiba la pynlong ia ki ar 2 klur ngut ki dkhot balang ha baroh ka pyrthei ba kin kitkhlieh ia ka pop jong uwei lane ar ngut ki nongialam (Ezekiel 18:20)

Ki jinglong ba iapher kiba la kren ha neng, bunsien la shem ha ki nongwad daw pyrshah ia ka balang, bad ka jingsngewthuh ia kine ki jinglong, kan iarap ia ngi ba ngin ym shah ialam bakla ha kita ki nongwad daw. Tang da kaba ithuh ia kito ki jinglong kam lah ban batai ba balei ba kito ki briew ki lah ban khring ia kiwei pat bad ban don ruh shibun ki nongbud.

Bun ki nongwad daw ki sngew ba ki leh ia ka ba dei, hynrei ka kam jingpynrem briew jong ki kam pynkhlain ia ka jingngeit lane kyntiew ia ka jingiatylli jong ka balang. Ka Ellen G. White ka maham tyngeh ba kito ki jait briew kim lah ban rung ha ka hima ka jong U Blei. Ka kren “ nga la iohi ba katto katne ki la iap tlor noh ha ka jinglong ba kynja mynsiem, ki la im katto katne por ban khmih bad ban kyrshan ia kiwei ba kin ia id beit, da kaba peit lut ia kawei pa kawei ka jingbakla jong ki briew bad ban wanrah jingeh ia ki. Katba ki leh ia kane, ka jingmut jong ki kam dei ha U Blei lane ha bneng lane ha ka jingshisha hynrei hangta ha kaba u soitan u kwah ia ki ban don – ha kiwei pat ki briew. Ia ki mynsiem jong ki la kyntait: kim ju iohi bad sngewthuh ia la ki jong ki jingbakla, namar ba ki nang tang ban peit ia ki jingbakla jong kiwei pat khlem da peit thuh ia lade bad ia la ka mynsiem bad ia la ki dohnud jong ki. Ka riam ka beit jong kiwei ka khring ia ki jingmut jong ki. Ki sngew dei ban kren ia uto lane kato ka briew bad ki pynlut bun ki por ha kaba kren siar ia kiwei. Nga la iohi ba baroh ki jingngeit niam, khyndiat ki mynsiem kiba ju peit lorni ia ki riam kibeit bad ia ki jingle jong kiwei bad ban wad daw ia ki. Lynda ki kylla kaba mut, yn ym don jaka ia ki ha bneng, namar ba ki wad daw hi ia U Trai hi.”

Lyngba ka histori, ka Balang basah jong U Blei barabor ka hap ban ia kynduh ia kine ki jait bynriew kiba wad daw wad dong, bad kane kan nang jur shuh shuh katba ngi dang jan sha ki por kiba kut. Hynrei ka Balang kan iai bat ia ka burom jong ka jingkular jong u Isaiah 54:17: “ Ka tiar baroh ba la thaw pyrshah ia pha kan ym myntoi; bad ia u thylliej baroh uba ieng pyrshah ia pha ha ka jingbishar phan pynrem, kane ka long ka bynta ki shakri U Trai, bad ka hok jong ki kaba na nga ong U Trai” *Testimonies for the Church, 1:145.*

Ia kane ka jingthoh la shon nyngkong kum “ A Igreja e seus criticos,” ha ka Revista Adventista (Brazil), April 2005, pages 16,17. La pynwandur bha ha ka Elder’s Digest.

La pynkylla ktien da:  
Pr. Standhope Hynniewta.  
SS & Personal Ministries.

## PERSONAL MINISTRIES

Ka jingmut jong ka personal Ministries ka dei ka jingshakri ba shimet shimet ia u Blei bad ia ka balang jong U bad ruh ia kiwei pat ki briew ki bym pat tip ia U Jisu. Ka jingsan jong ngi ha ka jingiadei bad kane ka subject ka long ha ki ar bynta: 1. Kaba marwei ha lade shimet bad 2 ka jingsakhi kaba shabar. Ka shakri ka jong U Blei ka Ellen G. White ka don ka khubor kaba kyrpang eh ia ngi baroh ki briew jongtang ia ka jingsan ha ka jinglong khristan jong ngi shimet shimet.

**Ki briew ka jingduwai:** “ym don kaei kaei kaba kham donkam ha ka jngtrei jong ngi ban ia ka jingmih babha na kaba iasyllok bad U Blei. Ngi dei ban pyni da ka jingim ba man la ka sngi ba ngi don ka jingsuk bad ka jingjahthait ha U Nongpynim. Ka jingsuk jong u ha ka dohnud kan paw ha khmat. Kata kan ai ia ka surkren ia ka bor ban pynkhohnguh. Kaba iasyllok bad U Blei kan pyndonburom ia ka jinglong jingim. Ki briew kin ithuh ia ngi kum ia ka synran kiba nyingkong, ba ngi la ju don lem bad U Jisu. Kane kan ai ha u nongtrei ia ka bor kaba kaei kaei kam lah ban ai. Ia kane ka bor u nongtrei um dei ban shah ba un doh ia ka” *The Ministry of Healing*. P. 512.

**Ki briew ka jingngeit:** Ki nongtrei ki donkam ia ka jingngeit ha U Blei. Um ju khlet ia ka jingtrei shitom jong ki. U niewkor ia ka jingtrei jong ki. La buh ia ki ezen bakynja blei ban iatrei ryngkat bad kito kiba iatrei ryngkat bad U Blei. Haba ngi pyrkhath ba U Blei um leh kumba u la kular, bad ba um don por ban peit thuh ia la ki jong ki nongtrei, ngi pynjah burom ia la u Nogthaw. *Christian Service*, p 232,234.

**Ki briew ka jingshlur:** ka jingkyrmen bad ka jingshlur ki long kiba donkam eh ban pynjanai ia ka jingshakri ia U Blei. Kine ki long ki soh jong ka jingngeit. Ka jingduh jingkyrmen ka long ka pop bad ka bym shongnia. *Prophets and Kings*, p 164. Ki dei ban don ia ka jingshlur, ka bor, bad ka jingiaialeh. *Gospel Worker*, p. 39.

**Ki briew jong ka kam:** ka kam jong U Blei ka dawa ia ki briew kiba lah ban iohi kloih bad bal eh noh ha ka por kaba dei biang bad trei da ka bor ban. Lada phi ap ban da thew ia kawei pa kawei ka jingduh lad ba phi iakynduh, phim ym leh ei ei ruh. Ka long kaba kham lah ban map haba kum rai bakla teng teng ban ia kaba iai long sah uba artatien,, uba pyntud, teng teng uba pynnoh sha kawei pat ka liang, nangta shiphang sha kawei pat. *Testimonies*, Vol. 3, P. 497.

**Balei ka balang ha ka Testament kaba Thymmai ka roi stet eh?** Na ka 120 ngut ki riew ngeit kiba ia lum lang ha ka kamra kaba haneng, ki ba la nang wan ia soh ki la long haduh 3000. U Blei u la pynlang shuh shuh sha duh ka 5000 ngut kiba la pdiang ia U Jisu bad hadien ki la nang bun da ki phew bad phew hajar. Kane ka dei namar ba uwei pa uwei u ia shim bynta ha kaba leit phla lyngba ki kular jong U Blei, un wallam ia ka jinglum ki mynsiem ynda ki dkhot balang ki la iashim bynta. “ka kam jong U Blei kan ym dep lano lano ruh lynda ki briew shynrang bad kynthei kiba long ki dkhot jong ka balang kin ia tylli ha ka kam ban pyniasoh ha ka jingpyrshang jong ki lem bad ki pastor bad ki ophisar jong ka balang. . . “ *Gospel Worker*, P. 352. Ka Ellen White ka thoh kumne: “Ym dei ban pyntud da lei lei ruh ha kane ka jingpyrshang ban hikai ia ki dkhot balang” *Testimonies* Vol. 9, P. 119.

**Ka Balang ka dei ka kynhun shipai:** Ia ka balang U Khrist lah ban ianujor bad ka kynhun shipai. Ka jingim jong uwei pa uwei u shipai ka dei kaba trei shitom, ka jingeh bad ha ka jingma. Ha man la ki dong ki ap ki nongshun kiba la ialam da u syiem ka jingdum u bym ju thait bad u bym ju iehnoh ia la ka jaka. Man ba u Khristan um sharai bha une u nongshun bakhlain bor u wan tur bor kynsan. Lynda ki dkhot ka balang ki trei minot bad sharai bha, un jop ia kid a ka buit saint jong u.

**Ka jinghikai da ki Pastor bad ki Rangbah Balang:** Kito kiba leit mih kum ki pastor, nongialap bad ki Rangbah balang ki don ka jingkit khlieh bashongkun kaba shong khia halor jong ki hynrei bunsien la lyndet khyllah eh. Katto katne ki sngetyinnad eh ban ialam bad ban ialap, hynrei kim ai satia ia ka jingtrei ka jingshakri ba marwei marwei sha ki balang. Donkam shibun eh ban ai jinghikai shaphang ki jingkit khlieh bad ki kamram sha U Blei, khamtam eh shaphang kaba siew ia ka bashiphew kaba hok. Ki Pastor bad ki nongialap jong ngi kin sngewsih eh lada ym shym siew tista ia ki na ka bynta ka jingtrei jong ki; hynrei hato kin pyrkhath sani ba dei ban don ka jingbam ha ka ing jingkyshew jong U Blei da kaba yn iai kyrshan ia ki nongtrei? Lada ki la rem ban leh ia baroh ka kamram jong ki ha kaba hikai bniah ia ki briew ban long kiba iaineh ha kaba siew sha U Blei ia kata ka jong U hi, yn don ka jingduna ka tyngka pisa ha ka ing jingkyshew ban pyniaid shaphrang ia ka kam jong U Trai.

U nongsharai jong ka kynhun langbrot jong U Blei u dei ban trei hok ia ka kamram jong u. Lada u don ka jingpyrkhath ba namar kane kam long kaba sngewtyinnad bad kaba sngewbha ha u, un ieh ia ka ban leh da uwei pat, um dei satia u nongtrei uba iaineh. To ai ba un pule ha u Malakhi ia ki ktien jong U Trai kiba uxor pyrshah ia ki briew ia ka jinglute ia U Blei ha kaba bat noh ia ki bashiphew. U Blei uba khrawbor U ong skhem, “phi long ba la tim da ka jingtim.” Malakhi 3:9 Haba uta uba shakri ha ka ktien bad ka jinghikai tynrai u iohi ia ki briew ba ki iaid ha ka lynti kaban wallam ia kane ka jingtim halor jong ki, kumno u lah ban lyndet ia ka kamram jong u ban ai jinghikai bad ka jingmaham sha ki? Ia uwei pa uwei u dkhot balang dei ban hikai ban long uba hok uba iaineh ha kaba siew ia ka bashiphew. (Testimonies Vol 9, sla 250, 251)

**Nongtrei ba kwah spah:** U soitan u la wallam ia kane ka jingpah ka jngphon sha U Khrist da kaba tip lada un pdiang ia ka, ia ka pyrthei yn ym siewspah. Te haoh ka dur bapher u wallam ia kajuh ka jingpynshoi sha ki nongialap jong U Blei mynta ki sngi, u da tip ba kito kiban shah pynbiej yn shukor ia ki da ka, bad kin long kibym shisha shuh sha ka kam ba la pynkhamti ha ki. Kam dei ka mon jong U Blei ba ki nongialap jong U kin long kiba iai wad ban riwspah. Shaphang kane u Paul u la thoh sha U Timothi “namar u thied jong ki kynja basniew baroh long kata kaba ieit sbai: ia kiba don kiba haba ki iabeh eh, la ialam bakla ia kin a ka jingngeit, bad la dung ia kid a kiba byn ki jingsngewsih. Ki Kam Ki Apostol p. 295.

**Parabangeit:** Dei ka mynsiem jong ka jingkwah lalot kaba ialam ia ki briew ban tyngkai na ka bynta ka jingpynhun ia lade shibun ka spah kaba dei hok ka jong U Blei, bad kane ka mynsiem ka long kaba ijli ha U. U la dumok tynggeh ia u paidlang jong u da kaba ong “ U brew un lute ia U Blei ne em? . . . Malakhi 3:8,9. Ka mynsiem jong ka jingai kylluid ka long ka mynsiem jong ka bneng. Ha kawei pat ka liang, ka mynsiem jong ka jingkhwan lade ka long ka mynsiem jong u soitan. Ka ain tynrai ba la pyni shai ha ki jingim jng ki riw pyrthei ka long tang ban ioh, ban ioh. Ki la kyrmen ia ka jingsuk jai hynrei u soh jong ka jingbet jong ki u long ka jinglanot khop bad ka jingiap.

**Nongkitkam hapoh balang:** To ai ba ka balang kan thung ia ki pastor bad ia ki Rangbah balang kiba la aiti lut sha U Trai Jisu, bad to ai ba kine ki Rangbah kin peit ba ia ki nongkit kam la jied kiban trei iaineh bha ia ka kam ban lum ia ki bashiphew bad ki jinganguh. Lada ki pastor ki pyni ba kim bit satia ia ka kam ba la pynkhamti ha ki, lada kim kdew ha khmat ka balang ia ka jingdonkam jong kaba pynphai sha U Blei ia kata ka jong U hi, lada kim khmih bniah ba ki nongkit kam hapoh jong ki ki long kiba trei hok, bad ba ia kaba shiphew la wallam, kin don ha ka jingma kaba khraw. Ki leh klet ia ka kam kaba wallam ia ka jingkyrkhu lane ia ka jingtim sha ka balang. Ia kum kita dei ban pyllait noh na ka ka jingkit khlieh jong ki. *Review and Herald Supplement, December 1, 1896.*

**Ia ki Rangbah balang:** Ka dei ka kamram jong ki Rangbah balang bad kiwei kiwei ki nongkitkam ka balang ban hikai ia ki briew ha kane ka kam badonkam, bad ban pyniaid beit ia kiei kiei baroh. Kum ki nongtrei lang bad U Blei, ki nongkitkam jong ka balang ki dei ban skhem jingmut halor kane ka jinghikai kaba shai. Ki pastor hi ki dei ban long kiba pyrkhing ban pyntrei kam ia ki hukum jong ka ktien jong U Blei. . . . To ai ba ki Rangbah balang bad ki nongkitkam jong ka balang kin bud ia ka jingbthah shai jong ka Ktien Bakyantang Khuid bad kyntu jur ha ki dkhot jong ki ia ka jingdonkam jong ka jingianeh ha kaba siew dep ia ki soksular, ia ki bashiphew bad ia ki jinganguh. *Review and Herald, December 17, 1889.*

**Pyni ka jingniew burom ia ki pastor** - Ki Nongmih khmat jong U Blei. - dei ban pyni ka jingniew burom na ka bynta ki nogmih khmat jng U Blei – ia ki pastor, ki nonghikai bad ki kmie ki kpa ia kiba la khot ban kren bad trei kam ha ka jaka jong U. *Education, sla 244.*

**Hikai ia ki khun ban niew burom:** Ia ki khun tang teng teng eh la hikai ba u pastor u dei u nongkit ktien jong U Blei, ba ka khubor kaba u wallam ka long kawei na ki lad trei kam ba la buh beit jong U Blei ha ka jingpynim ia ki mynsiem, bad bas ha baroh ba la wallam ia kane ka lad ka kabu ba kin ioh ia ka kan long ka jingiwbih sha ka jingim lane ka jingiwbih sha ka jingiap. *Testimonies, Vol 5, sla 497.* Ia kaei kaei kaba kyntang, ia kaei kaei kaba dei sha ka jingmane ia U Blei, ym dei satia ban leh bymsuidniew bad pyni ia ka jingbym salia ei ei.. haba ia ka ktien ka jingim la kren phi dei ban kynmaw ba phi sngap sha ka surkren jong U Blei lyngba u shakri ba la jied jong U. . – *Messages to Young People, sla 266.*

**Pynlong ka jingmlien ban tieng burom:** Ia ka jngtieng burom la donkam shibun eh ha ki samla jong kane ka juk. Nga la itieng katba nga la iohi ia ki khynnah bad ki samla jong ki kmie ki kpa kiba skhem ha ka jingngeit niam ba kim suidniew shuh ia ka jingbuh beit bad ia ka jingleh badei biang ia kaba dei ban bud hapoh ka ing jong U Blei. Katba ki shakri jong U Blei ki dang ialap ia ki ktien ka jingim sha ki briew katto katne ki pule, kiwei pat ki iapasiaw bad iarkhie. Ki khmat jong ki ki leh pop da kaba pynphai ia ka jingpynleit jingmut jong kito sawdong jong ki. Kane ka jingmlien lada shah ba kan iaisah khlem da pynbeit pynbha kan nangsang ban ktah ia kiwei pat. Ki khynnah bad ki samla kim dei lano lano ruh ban sngew ba ka dei kaei kaei ban sngew sarong ban long ki bym salia bad bymsuidniew hapoh ki jingiaseng ha kiba u u Blei la mane. U Blei u iohi lut ia kawei pa kawei ka jingpyrkhat lane ka jingleh bymtieng burom, bad la thoh kynmaw ia ka ha ki kitab jong ka bneng. *Youth Instructor, October 8, 1896*



**U Nongialap jong U Blei:** U nongialap uba long u nongtrei lem bad u Khrist un don ia ka jingsngew kyntang bashongkun ia ka kam jong u bad ia ka jingtrei minot bad ka jingkheinduh ba la dawa ban trei ia ka da kaba jop bha. Um wad ia la ka jong ka jingsuk lane ka jingbit ka jingbiang. U long uba la klet ia ka lade. Ha ka jingwad jong u ia ka langbrot kaba la jah noh um sngewthuh ba ma u hi u thait u lwait, u khriat bad thngan. U don tang kawei ka jingthmu: ka jingpynim ia kata kaba la jah noh. Ki Kam jong ki Apostol p. 291. Kito kiba len noh ia ka bor jong ka jingshakri kaba shisha jong ka jinglong nongtrei ba riewblei bad ba kheinduh ki pynjah burom bad pynhiar dor ia ka jinglong lyngdoh bad kan paw kum ki nongtrei kiba arsap ha khmat ka balang bad ha khmat u briew bad ha khmat U Blei, bad ka dei ia ki ba kin pyllait noh ia ka kam kaba ki bat.

### **KA KYIAD BAD KI JINGDIH PYNBUAID: KI DEI KI SHYNGKHAWIAH BA LA BUHRIEH SHA KA JINGIAP**

“Nga lah ban leh ia kiei kiei baroh ha uta uba pynshait bor ia nga.” Philipi 4:13.

U ksuid um don bor halor ka jingiap (Hebru 2:14) da kaba pynjot kloie ia ka bor pyrkhata, da kaba kular ia ki samla, ki actor bad kiwei kiwei da kaba pynlong ka jingeh bakhraw ha Kerela, kaba long kaba hakhmat eh ha ka jingdih kyiad.

#### **Ki jingma ka kyiad bad ki jingdih buaid (drugs)**

Ka kyiad bad ki jingdih buaid ki wanrah shibun ki jingeh ha ka jingtreikam ki dkhot met u briew bad ki thaw ki jingpang ba bunjait ia kiba la kynthoh harum:

- (a) Ka jinglehbieit.
- (b) Ka jingtlot ha ka shongkha shongman.
- (c) Ka jingtlot ka bor pyrkhata.
- (d) Kiew ka jingkynshaitsnam.
- (e) Iap shiliang.
- (f) Prum ki snier.
- (g) Pang khrew (TB).
- (h) Ki jingbymlah ioh khun.
- (i) Jingpang AIDS (niangkhulia).
- (j) Bampong.
- (k) Jingpang stem.
- (l) Bym i mat.
- (m) Jingpang ki tor.
- (n) Ka jingiapler (bymtip briew).
- (o) Pneumonia.
- (p) Ka jingeh u dohnud.

Ka jingbrai ban pyndonkam ia ka kyiad bad jingdih buaid ka ialam sha ki jingpyniap briew, ki accident ha surok, ka jingshah iehnoh marwei, ka jinghiar ha ka ioh ka kot, ka jingkwah shim noh ia la ka jingim, ka jinghiar dor ha ka imlang sahlang.

## **Jingdih buaid (drugs)**

Kino kino ki jingdih kiba khlain kiba pynlong ban brai bad iai kwah kum u kynja, karupu – kine ki pynmih ia kata ka bih kaba ngi tip kum ka shini sawbthuh, ki long ruh kum ki dawai pyniohthiah.

## **Ka jingdih sikret**

Kumba 150 snem mynshuwa ka Mrs. E G White ka nongsumar Sabbaton ka la ioh ka jingiohpaw na U Blei ban maham ia ka pyrthei ba ka jingdih дума ka long ka bih ba pyniap namar u don ia ka tar, nicotin, carbonmonoxide, hydrogen cyanide. Mynta ki stad ban wad bniah ia ka koit ka khiah ki la shonshap ia u дума kum u nongpyniap briew ba triem duh. Mynta ka pyrthei baroh kawei kynthup ia ki stad wad bniah ki la tip bad ithuh ba ka jingdih дума/sikret ka dei ka nong pyniap briew ba shyrkhei. Hynrei ka jingdih дума ka dang iaineh kum ka jingmlen basniew ha ka imlang sahlang.

## **Ka jingbam kwai tympew – Ka nong pyniap briew**

Ka jingbam ia u tympew u kwai bad дума ka long ka jingkhleh ba long bih ka jingbuaid kaba mih na kaba bam kwai ka pynlong ia ki briew ban ia ioh lok kulmar, nalor kata, ka pynlong ia u briew/ka briew ban dom riang ban sngewsih, ban klet, ban iapler namar kine baroh ki mih na ka jingbam ia u kwai дума tympew bad ka shini.

## **Ka jingjwat ban pynduh**

Shisien ba la mlien ban pyndonkam ia ki jingdih ba don bih kum ka kyiad bad ka jingdih ba pynbuaid, ka met ka la kwah shi kwah ban ioh ia ka man ka sngi. Kane suki suki ka ktah ia ka bor pyrkhath bad ia ka met hi ruh baroh kawei, kumta shibun ki briew ki long mraw ha kine ki jingdih ba pynbuaid. Ynda la thew bha ia ka snam ka bih ka la bun ha ka snam ban ia kaba bha. Kane ka pynkulmar ia ka bor pyrkhath bad ka met ruh ka pang. Ban pynklet na kine ki jingiakynduh ba shyrkhei ki hap hi ban iai bteng ia kine ki jingdih ba pynbuaid. Kumta ka jingim jong ki ka long kaba sangsot bad ba jynjar.

## **Ka jingpynkoit**

Ka lynti ba bha ban jop ia kine ki jingjynjar. Kiba suhsat ki dei ban long kiba phikir bad kiba pynlut por bad U Blei ha ka jingduwai. Ka jingiada ka khambha ban ia ka jingpynkoit kumta barobor dei ban ialeh ban nym kwah ban hap ha ki jingriam jong u Soitan bad ka eh ban pyrshang ban lait pat ynda la shah riam.

Kawei na kidaw ba kongsan balei ba ki khun samla jong ngi ki shah riam ha kine ki jingsniew, ka dei ba ki iapyrthuh bud paralok, namar kata ki kmie ki kpa ki dei ban da sneng bad hikai bha ia la ki khun ban jied ia ki paralok jong ki.

Lada liat tang shisien da kaba bakla kam long pat kaba suk ban bthat ia ka, ka bor ban jop ka long ban wad jingiarap na U Jisu Khrist Uba long u nongpynim basbun bajemnud jong ki brierw baroh. Um ju iehnoh iano iano ruh kiba wad bad pan bor na U ban jop ia ki bor u Soitan baroh. U Jisu U sngewbha ban pynim ia u bynriew baroh na ki tyrsim jong ka pop bad ban ai ha ki ia ka jingim ba bymjukut. Ha kawei pat ka liang kane baroh dei ka jingthmu jong u Soitan kum ka kynhun nongshun U Blei ban pynjot ia ki bynriew da kaba ialam ia ki ban bunkam ha ka thok, ka shukor bad kiwei ki jingleh jali jaum. Namar kata khlem kano kao ka jingtynkai to ngin iasnoh kti lang ban jop ia ki jingthmu jong u Soitan uba kwah ban pynjot ia ki brierw ia ki ing ki sem, ia ka imlang sahlang. Ia u Soitan la tip kum u dragon, u bsein bymmen, u ksuid. U nongshohnoh brierw naduh ba sdang, u kpa ka lamler, u nong shukor ka pyrthei u trei tynggeh hapdeng ki brierw ha kata ka rukom ban pynlong ia kine ki kyrteng ba la kdew haneng kaba don jingmut bha. Ka jingshukor ba shyrkhei ia ki brierw ka long ban pynlong mraw ia ki ha kine ki jingduh pynbuaid. Kumta u pynjot ia ka bor pyrkhath bad ia ka mon jong ki. U pynpait phrai ia ki ing ki sem ia ka imlang sahlang. Khadduh u ialam ia ki sha ka jingjot ba bymjukut. Kordit ia kita ki nongshong shnong ka pyrthei bad duriaw namar u ksuid u la wan hiar da ka jingdom ba shyrkhei, namar u tip ba ka por jong u ka lyngkot tham. Jingpynpaw 12:12.

### **Luke 21:34 ka ong**

Namar kata to sumar ialade ioh kumno kumno ki dohnud jong phi kin sngewkhia da kaba bam lalot bad da kaba buaid, bad da ki jingkluslai pyrthei, bad ba kata ka sngi kam lap kyndit ia phi kum ka jingriam: naba kumta kan ngat ha kita baroh kiba shong sah ha sla ka khyndew baroh. Ka jingthmu barieh jong u Soitan ka long ban pynjngai ia ki jingmut jingpyrkhat jong ki na U Blei sha ki jingjot ba shyrkhei da kaba pynlong ia ki ban bunkam ha ka bam lalot, jingdih ban pynbuaid, ban pynkluslai ia ki da kiei kiei kiba kynja pyrthei; kumta da husiar ban jop ia baroh ki jingpynshoi jong u ksuid ban ym treh ia kum kine ki jingpynbuaid da ka jingiarap jong U Jisu Uba long U Nongpynim ba sbun eh jong ka pyrthei.

## **KA HISTORY LYNGKOT JONG KA BALANG ADVENTIST HA RI KHASI BAD JAINTIA**

Ka jingngeit Adventist ka la wan poi sha ri Khasi bad Jaintia lyngba ki Missionary kiba wan na sha ri nongwei. U Missionary banyngkong eh uba la wan poi ha Shillong u dei u F.O Raymond, u nongdie kot uba la wan ban die kot bad sam ia ki track ha u snem 1913. Ha u snem 1915 u E.G Hardinge u Officer jong ka Survey Department jong ka British India u la wan sha Shillong kum u Officers-incharge jong ka Assam Survey bad traverse party. Haba u Hardinge bad ka ing jong u ki la poi ha Shillong, ym pat don Adventist uwei ruh ha Assam baroh kawei, namar ha kato ka por kane ka Northeast baroh kawei ka dang hap hapoh Assam.

Wat la katta ruh, u Hardinge bad ka ing jong u kim shym la duh jingkyrmen ban phla ia ka jingshisha. Ki ju iawer lang ia ki paralok bad ki jan ing jan sem ban iamane bad ki man la ka miet sngi pynkhreh bad man la ka step bad janmiet Sabaton.

U Hardinge u dei u briew uba shitrhem bha ban iasam ia ka khubor jong ki lai angel sha man la ki thliw ing bad ki shnong ki thaw ba u wan poi. U pynmih ia kawei ka kot lyngkdop (tract) ha ka ktien phareng ia kaba la pynkylla sha ka ktien khasi da uwei u nongtrei jong u u Mr. EE Doram. Kum ka jingmih na ka jingphla shitrhem jong u Hardinge, arngut shipara ki la shah pynbaptis ha u snem 1920. Ha u snem 1928 pat ia u Mr. Matthews uba la 84 snem ka rta lem bad ki arngut ki khun kynthei jong u Hardinge ka Leslie bad ka Mervyne la pynbaptis da u pastor Keller. Haden katto katne por pat u Mr. E.E Doram ruh u la shim jingpynbaptis. U la long ruh uba nyngkong eh na ki Khasi uba la kylla Adventist.

Nalor jong ki, ki nongtrei ka Mission office ha Kolkatta ruh ki la wan ban ai mynsiem bad kyrshan ia u Hardinge ha ka kam khring mynsiem. Nalor u Wyman bad u Raymond sa arngut shuh shuh ki pastor u Pastor Wilson bad u Pastor Wellman ki la wan ban jngoh ia ka Shillong. Hashuwa ba u Hardinge bad ka ing jong u kin leit phai duh sha la ka ri ha u snem 1933. U Pastor bad Mrs. L.J Burgess ki la wan poi sha Shillong ha u snem 1931. Ki Burgess ki dei kiba nyngkong eh ban wan trei bad sah ha Assam kum ki regular Missionaries. Ia u Mr. Rajee bad I lok jong u la pynbaptis da u Pastor Burgess ha u bnai September 16, 1934.

Ka jingsdang ban organised ia ka kam mission ha Assam ka la jia ha ka por jong u pastor bad Mrs. J.F Ashlock, kiba la wan poi sha Shillong ha u June 27, 1935. Ia ka Assam Mission la sdang ha u snem 1935 bad u pastor J.F Ashlock u la long u Superintendent banyngkong eh.

U pastor Ashlock u la pynlong 6 tylli ki Evangelistic effort ha ki jaka bapher bapher kynthup ruh ia ka Mawkaiew ha Jaintia Hills. La wan synran ia u da ki katto katne ki pastor kum u pastor O.W Lange, pastor C.A Boykin bad u Mr. Burlow bad ki lok jong ki. Ha kaba kut jong kitei ki jingiaseng ialap 10 ngut ki briew ki la shah pynbaptis bad ha kaba kut jong u snem 1939 ki dkhot balang ha Shillong ki la kot sha ka 50 ngut, kata ka kynthup ia ka Assam baroh kawei.

U pastor Ashlock u la long Superintendent ia ka Assam Mission tang khyndiat snem. U N.O Dahlstein u la shimti kum u Superintendent naduh 1947 haduh 1952.

W.C Rick—1953 haduh 1954

Pastor H.T Burr—1955 haduh 1957  
Pastor B.J William—1958 haduh 1960  
Pastor C. A Boykin—1961 haduh 1965  
Pastor N.R Baird kum u President banyngkong eh —1965 haduh June 1971  
Pastor D Nongtdu 1<sup>st</sup> Indian President—1971 July haduh 1980 December  
Pastor J.I Khonghat—1980 haduh 1983  
Pastor D Nongtdu –1984 haduh 1989  
Pastor JM Dkhar—1990 January haduh 1990 December  
Pastor D Marang –1991 January haduh 1991 December  
Pastor WS Dkhar—January haduh March 1992  
Pastor MM Rimsu—1992 haduh 1996  
Pastor LF Lyngdoh—1996 haduh 2000  
Pastor H Nongkhlaw—2001 haduh 2003  
Pastor KB Kharbteng –2004 haduh 2014  
Pastor W Lapasam –2015 haduh bakut

Ka Mizo Conference ka la khlad noh na ka northeast India Section ha u snem 1972. Ka Manipur pat ha u snem 1982

Ha u February 25, 1996 ia ka Meghalaya Section la phiah ha ki ar Section, East Meghalaya (Khasi & Jaintia) bad West Meghalaya Section (Garo)

Dei ha u bnai January 24, 1998 ba ka east Meghalaya Section ka la ioh ia ka Conference Status bad la ai kyrteng ia ka da ka Khasi Jaintia Conference.

Ha ka GC ba dang shu dep long ha San Antonio, ngi la ioh ia ki riport bad ki jingphla shem mynsiem kiba sngewtynnad bad ai mynsiem na ki nongkren jong ki Division bapher bapher. Kine harum ki long ki katto katne ki riport ba kham kongsan eh ha katei ka jingialang. East-Central Africa Division—Ka East-Central Africa Division ka dei kawei na ki Division kaba roi sted tam ha ka pyrthei. Tang hapoh san snem ki la lah ban thung haduh 1,874 tylli ki balang, 8 tylli ki hospital, kawei ka college, 9,460 ngut ki evangelist khynnah, 21 tylli ki Station Radio, 6 tylli ki conference bad 3 tylli ki Union.

Inter-American Division—Ha kaba sdang jong ki san snem ba la dep, katei ka Division ka la buh thong ban pynbaptis haduh shi million ngut ki mynsiem, hynrei ha kaba kut jong ki san snem da ka jingaiei U Blei katei ka Division ka la lah ban pynbaptis palat ia ka thong ba ka la buh. Don ar tylli kiei kiei kiba katei ka Division ka la leh, kiba la pynlah ia ka ban kot ia katei ka thong (1) Ka ai Training ia ki dkhot balang kumno ban pynpule Baibl ia ki briew, pynlong jingiaseng ialap, iatrei lang bad ki pastor ne evangelist bad iatylli ha kiei kiei baroh. (2) Ka thung bun ngut ki nongdie kot (Literature evangelist) kiba leit rung na kawei ka thliew ing sha kawei pat ban die ia ki kot niam. Ki dkhot balang ha katei ka Division ki long kiba kylluud mynsiem, kiba iatylli bad kiba pynphai hok ia kaba shiphew, ka dei kawei na ki Division kaba pynmih bun eh ka jingkyshew.

Northern Asia-Pacific Division—Ka Northern Asia-Pacific Division ka kynthup ia hynriew tylli ki ri, China, Japan, Korea, North Korea, Mongolia bad Taiwan. Ban pynkylla khristan ia ki

briew ha katei ka jaka ka long kaba shitom haduh katta katta, namar ba ki don ki niam tynrai kum ka Buddhist, Shintoism, Confucianism bad kiwei kiwei kiba la suhthied bha ha kitei ki jaka. Ki khristan ki don tang 4 percent ha katei ka Division. Katei ka Division ka don ar tylli ki rukom pynphriang ia ka gospel (1) lyngba ka city evangelism ( jingialap ha ki nongbah). (2) Da kaba pynshlur ia ki khynnah samla ban trei ia ka kam missionary la ka dei hapoh ri ne sha ri nongwei.

Lyngba kitei ki artylli ki rukom pynphriang ia ka gospel, katei ka Division ka la lah ban khring shibun ki mynsiem shapoh ka balang hapoh jong kine ki san snem ba la dep. Katei ka Division ka sngew ba da ka bor briew jong ki ka long kabym lah ban pyndep ia ka jingialap ia ka gospel, hynrei ki don ka jingngeit baskhem ba da ka bor jong U Mynsiem Bakhuid yn sa lah ban pyndep ia ka jingialap ha katei ka jaka. Ki ngeit ia ka jingong jong ka Mrs. White kaba ong kumne, “ ngim donkam ban sheptieng shaphang ka lawei, lait sa tang ba ngi klet noh kumno U Blei U la ialam ia ngi ha ki por ba la dep”.

Ha katei ka jingiakynduh lang jong ki delegate na kylleng ka pyrthei la iapeit biang (review) ia ki 28 tylli ki jinghikai tynrai jong ka balang Seventh-day Adventist. Kine harum ki long ki katto katne ki jingynbeit ia ki jinghikai tynrai jong ka balang.

### **Reports from West Jaiñtia Circle**

Ka long kaba sngewtynnad ban iathuh ba ha west jaintia circle ngi don katto katne ki jingjia kiba sngewtynnad ban ai report.

1. Ngi la ioh lai tylli ki iingmane ba thymmai ha ka balang A.T.S, Khasi. Kane ka iingmane ka la rim bad ka la sdang jaw kumta ki paraba ngeit ki la ia kyrpad ia ka Conference ban leh ei ei, kumta na ka liang ka Conference ka la pyrshang katba lah ban iarap pynthymmai, ngi sngewkmen ba ngi don ia I Mr. D. Kharyngki iba long i nongtei iingmane iba la tbit bha, kumta ka iingmane ba mynta ka la ioh ia ka dur kaba thymmai bad kaba i shongkun shisha. Ngi sngewnguh ia U Trai na ka bynta kane ka jingleh sbun ia ki parabangeit ha A.T.S (Khasi). Ia kane ka iingmane la dep pynkyntang ha ka 5 tarit u September 2015 da U Pr. W. Lapasam, u President jong ka KJC, lem bad U Pr. L. F. Lyngdoh, u President ka NEIU.

2. Ka Maranatha ruh ka la pyntei 5 tylli ki iingmane ha Khasi Jaiñtia Conference. Ia kine ki iingmane latei ha Nongkhroh, Nartiang bad Mawsiang Lamare, Sohparu bad Mawlali. Ia kine ki iingmane la shna da ka kynhun na Amerika kaba na ka balang Corona Califfornia ( Ki Maranatha Volunteers) kaba don 35 ngut ki nongtei iingmane kiba la ia trei ryntih bha, kynthup ruh bad 5 ngut kiba na India ki ba dei ka maranatha team. Ka jingtei ia kine ki iingmane ka long kaba sted bha haduh kata kata. I ka iingmane ha Nartiang latei tang ha ka 20 tarik u July bad 21 tarik, bad ki pyndep ia ka tang shisngi shiteng, nangta ki sa tei sa ka wei ha Nongkhroh ha ka 22 bad 23 tarik, ia kane ruh ki pyndep tang shi sngi shiteng. Ha ki juh hi ki sngi ki la leit tei ruh ia ka iingmane sha Mawsiang Lamare kaba don ha East Jaiñtia Circle. I aka jinglut jingsep na ka bynta kine ki iingmane, la pynlut da ka Maranatha bad ka Conference ka pynlut 25% (percent). Ka Conference ka kwah ban ai khublei ia ka Maranatha, Ka Balang Corona, California bad Ka Union n aka bynta ka jingtei ia kine ki iingmane.

3. Katba ia ki iingmane ki dang tei mynsngi mynmiet pat ki pynlong ka jingiaseng ialap man la ka miet ha Nongkhroh, naduh 20 haduh 25 U July 2015. Bad ia kane ka jingialap la leh da i Pastor Gilberto Delveccio, bad i nong ialam ia ka kynhun dei i Mrs. Sharon Anderson, i Mrs. Kelly pick i iathuh khana ia ki khynnah man la ka miet. Ka don ruh ka jinghikai shaphang ka jingkoit jingkhiah man la ka miet da i Nurse, Sister Gail Outhwaite. Ha kane ka jingialap la wan sngap palat 500 ngut ki briew man la ka miet, haduh ba ym don jaka shong shuh bad ki paitbah ki hap ban shu ieng sha bar. Man la ka miet ki ia ai jingai sngewbha ia ki khynnah, bad ha ka sngi sabbaton kaba khatduh ki la sam ia ki jaiñ, ki jingialehkai ia ki khynnah. Ki ai pisa ruh ia ka Balang Nongkhroh bad ia ka Balang Nartiang, ki ai ruh kawei ka Ampli-speaker ia ka Balang Nartiang, ki la ai dawai bad shibun ki briew ki ia wan ban ioh jingsumar ei ia ki bniat ha Nartiang bad ha Nongkhroh ruh. Nalor nangta ki ai ruh shibun ki iit khmat pule kot, ki sabon, ki jingtah khmat, ki shampoo, ki dawai kyrshut bniat, bad shibun ki Baibl, bad kiwei kiwei de.

*Aibor Sohkhlet*

*Circle Director*

*Communication Department*

*Khasi Jaiñtia Conference of SDA*

### **Ki iingmane bathymmai ha Khasi Jaiñtia Conference**

Kine harum ki long katto katne ki report ba sngewtynnad shaphang ka jingtei iingmane hapoh ka Khasi Jaiñtia Conference.

1. Ngi la ioh saw tylli ki iingmane ba thymmai ha ka balang A.T.S, Khasi. Kane ka iingmane ka la rim bad ka la sdang jaw kumta ki paraba ngeit ki la ia kyrpad ia ka Conference ban leh ei ei, kumta na ka liang ka Conference ka la pyrshang katba lah ban iarap pynthymmai, ngi sngewkmen ba ngi don ia I Mr. D. Kharyngki iba long i nongtei iingmane iba la tbit bha, kumta ka iingmane ba mynta ka la ioh ia ka dur kaba thymmai bad kaba i shongkun shisha. Ngi sngewnguh ia U Trai na ka bynta kane ka jingleh sbun ia ki parabangeit ha A.T.S (Khasi). Ia kane ka iingmane la dep pynkyntang ha ka 5 tarit u September 2015 da U Pr. W. Lapasam, u President jong ka KJC, lem bad U Pr. L. F. Lyngdoh, u President ka NEIU.

2. Ka Maranatha ruh ka la pyntei san tylli ki iingmane ha Khasi Jaiñtia Conference. Ia kine ki iingmane latei ha Nongkhroh, Nartiang bad Mawsiang Lamare, Sohparu bad Mawlali. Ia kine ki iingmane la shna da ka kynhun na Amerika kaba na ka balang Corona Califfornia ( Ki Maranatha Volunteers) kaba don 35 ngut ki nongtei iingmane kiba la ia trei ryntih bha, kynthup ruh bad 5 ngut kiba na India ki ba dei ka Maranatha team. Ka jingtei ia kine ki iingmane ka long kaba sted bha haduh kata kata. I ka iingmane ha Nartiang latei tang ha ka 20 tarik u July bad 21 tarik, bad ki pyndep ia ka tang shisngi shiteng, nangta ki sa tei sa ka wei ha Nongkhroh ha ka 22 bad 23 tarik, ia kane ruh ki pyndep tang shi sngi shiteng. Ha ki juh hi ki sngi ki la leit tei ruh ia ka iingmane sha Mawsiang Lamare kaba don ha East Jaiñtia Circle. I aka jinglut jingsep na ka bynta kine ki iingmane, la pynlut da ka Maranatha bad ka Conference ka pynlut 25% (percent).

Ka Conference ka kwah ban ai khublei ia ka Maranatha, Ka Balang Corona, California bad Ka Union n aka bynta ka jingtei ia kine ki iingmane.

3. Katba ia ki iingmane ki dang tei mynsngi mynmiet pat ki pynlong ka jingiaseng ialap man la ka miet ha Nongkhroh, naduh 20 - 25 U July 2015. Bad ia kane ka jingialap la ialap da i Pastor Gilberto Delveccio, bad i nong ialam ia ka kynhun dei i Mrs. Sharon Anderson, i Mrs. Kelly pick i iathuh khana ia ki khynnah man la ka miet. Ka don ruh ka jinghikai shaphang ka jingkoit jingkhiah man la ka miet da i Nurse, Sister Gail Outhwaite. Ha kane ka jingialap la wan sngap palat 500 ngut ki briew man la ka miet, haduh ba ym don jaka shong shuh bad ki paitbah ki hap ban shu ieng sha bar. Man la ka miet ki ia ai jingai sngewbha ia ki khynnah, bad ha ka sngi sabbaton kaba khatduh ki la sam ia ki jaiñ, ki jingialehkai ia ki khynnah. Ki ai pisa ruh ia ka Balang Nongkhroh bad ia ka Balang Nartiang, ki ai ruh kawei ka Ampli-speaker ia ka Balang Nartiang, ki la ai dawai bad shibun ki briew ki ia wan ban ioh jingsumar ei ia ki bniat ha Nartiang bad ha Nongkhroh ruh. Nalor nangta ki ai ruh shibun ki iit khmat pule kot, ki sabon, ki jingtah khmat, ki shampoo, ki dawai kyrshut bniat, bad shibun ki Baibl, bad kiwei kiwei de. To ai ba U Blei un khyrkhu ia kane ka Team katba ka dang trei ia ka kam jong U na kawei ka jaka sha kawei pat.

*Prosperity Lamare, Director  
Communication Department  
Khasi Jaiñtia Conference of SDA*

### **Ka jingaihubblei**

Ngi ki khun ki kti bad ki ba haiing jong I Late Kong Prolsina Lyngdoh Nongum, na New - Nongstoin, ngi kwah ban ai khublei ia phi ki parabanggeit, paralok bad Conference ia ka jingsngewlem ba phi la pynpaw ia ka jingiakyrsan bad jingiatreilang ha kine ki por ba lah leit noh hapdeng jong ka jingpang kaba jur ba la ban ia I Late Kong Prolsina L. Nongum. I kong Prolsina I la shitom jur na ka jingpang ba ktah ia ki bynta jong ki khyllai naduh u bnai October 2014 ha kaba ki doctor ki la shem ba baroh ar ki khyllai kim trei kam shuh. Te kumta ban pynim ia I donkam ban shu ai snam ba ki khot ka Dialysis kumba shisein shi taiew. Tang haba la ban jur ka jingpang hap ban ai snam ar sien shi taiew ruh. Ka jingpynlut ka long shibun bad khlem ka jinglakloi ka jingiarap jong phi lyngba ka bor met, mynsiem, pisa bad jingdwai ngi kum ka iing ka sem ngi sngewkutlad. Ngi da sngewnguh shisha ia ki katto katne kiba la ai jingiarap da kaba donate snam ia I Late Kong Prolsina, khamtam ia ki samla ka balang Shillong. Kumba ngi lah dep ai khublei ia phi ha ka kwartar ba lah dep ngin ym jer kyrteng shuh ia phi iwei pa iwei.

I Prolsina, khyndiat sngi shwa ba in khlad noh ha ka 25 tarik September 2015, I la pynbeit ia ka jingiadei jong I bad U Blei bad long ruh ba la kloï ban ioththiah shibit por ha ki ksangkti jong U Trai. Wat hapdeng ka jingpryshang da kiba bun ki lad kat kum ka bor jong ngi, ngi hap ban mad ia ka jingduh noh ia i. Kumta ka jingai khublei jong ngi ka dei ruh ia ki parabangeit, paralok bad ka balang kaba la iabeh ban wan sngewlem bad pyntngen ia ka iing jong ngi hapdeng u lyoh uba dum uba la wan tap ia ki mynsiem ba pang bad ban khia ia ngi. To U Blei Un kyrkhu ia phi baroh ha ka jingsuk jingkmn bad jingkoit jingkhiah. Ngim lah ban siew kylliang ia ka jingshakri



jong phi baroh hynrei ngin iai kynmaw ia phi ha ka jingdwai na ka bynta ka jingri sumar U Trai Nongthaw.

Sylvestar.

## **Stewardship Weekend**

Ngi kwah ban ainguh ia u Blei namar ba u la ai ia ngi ka lad ba ngi lah ban pynlong ia ka Stewardship Weekend ha san tylli ki balang mynta u snem (2015). Ngi kyrmen ruh ba hashwa ba une u snem un kut, ngin dang lah ban pynlong biang ia kum kine ki Stewardship Weekend sha kiwei pat ki balang da ka jingiatreilang ka Ka Stewardship Ministries jong ka Khasi Jaiñtia Conference bad ka Northeast India Union. Wat lada ngi la don ia ki promotion na kawei ka por sha kawei pat hynrei ngi dap da ka jingsngewkmen ba U Blei u la ai lad ia ngi ba ngi la lah ban pynlong iaka Stewardship Weekend ba nyngkong ha ka balang Mynska ha u bnai June 12 & 13, 2015. Ha kane ka taiew, naduh ka jingiaseng miet pynkhreh bad haduh ka janmiet Sabbaton la kren shaphang ka Jinglong Sordar. Ngi la ioh ban shim haduh saw ne san tylli ki session. Bad ia kine ki session la shim da U Pr. Kashipri Archete, Director, Stewardship Ministries, NEIU bad U Mr Prosperity Lamare, Director, Stewardship Ministries, KJC. Ha kane hi ka Sabbaton ka la don ka jingpynkyntang ia I khunlung jong u Mr & Mrs. Pynwandur Dkhar bad ka jingpynbaptis ia ki saw ngut ki mynsiem ba kordor da u Pr. Kashipri Archete. Ki parabangeit ki la iawan sha baroh kine ki jingiaseng bad ka iingmane ka la khapngiah shisha haduh katta katta.

Ha kajuh hi ka rukom, ngi la lah ruh ban pynlong ia ka Stewardship Weekend ha ka balang Laitumkhrah, Shillong ha ka 10 & 11 tarik u bnai July, 2015. Ia kine ki program ruh kumjuh la shim hi da ma ngi arngut, Ha kaba ma nga, nga la kren shaphang ki subject- “Ka Jinglong ba Iaineh U Job kum u Sordar bad U Sordar Uba la pynkylla iala ka Jingim”. U Pr. K. Archete pat u la kren halor ka Subject- Ka rukom Ai sha U Kynrad bad Ka jingthmu jong ka Jingai ia ki Jingainguh”. Hoid, lyngba kine ki Stewardship Weekend, ngi la ioh shisha ka ki jinghikai bad ki jingkyrkhu shikatdei eh. Nga ngeit skhem ba ki parabangeit jong ngi ruh ki la ioh shibun ki jingkyrkhu na kine ki jinghikai ba ngi la iasam. Ha kaba kut nga kwah ban kyntu ia ki para nongtrei, ba ki ruh kin ialap ia kane ka khubor ba ngi baroh ngi dei tang ki Sordar jong u Blei. Ha ki parabangeit ruh kumjuh, to ai ba ngin nymngew ba kane ka department ka kren tang shaphang Kawei na Kaba Shiphew ne ka Jingkynshew Ainguh hynrei ka kren palat ia kata bad kata ka long ba Kumno ka jingiadei jongphi bad U Blei ha ka liang ba Kynja Mynsiem ne Kynja met. Lada ka jingiadei bad ka jingieit jong phi bad u Blei ka long shisha kaba khlaiñ, ngim donkam shuh ban promote ia ka Stewardship, kan wan hi nala ka dohnud jong phi automatically. To ai ba u Blei un kyrkhu ia phi baroh kiba pule ia kane ka report.

Prosperity Lamare, Director  
Stewardship Ministries  
Khasi Jaiñtia Conference of SDA

## **U MYNSIEM BAKHUID KUM U NONGIASAID, U NONGPYNTNGEN/ NONGIARAP**

### **U Mynsiem Bakhuid kum U Nongiasaid**

1. Rome 8:26 U Mynsiem Bakhuid U iasaid (kyrpad) na ka bynta jong ngi ha ki jingduwai. Namarkata, ngi dei barobor ban kyrpad ia U Mynsiem Bakhuid ba un iasaid (kyrpad) na ka bynta jong ngi man ka por ba ngi duwai khnang ba ki jingkyrpad jong ngi kin long kiba iadei bad ka mon jong U.

2. Rome 8:27 Hynrei Uta (U Blei Uba U Kpa) kein uba iit ia ki dohnud U ithuh kaei kata ka jingmut ka jong U Mynsiem: naba U kyrpad (iasaid) na ka bynta ki riewkhuid katba kum ka mon U Blei.

Note: Phim iasaid/ kyrpad na ka bynta ialade, hynrei na ka bynta kiwei pat. Kumta ruh U Mynsiem Bakhuid.

Lada U Mynsiem Bakhuid U long tang ka bor (power) ne ka jingdon (presence) jong U Blei Uba U Kpa ne jong U Jisu Khrist, kumno Un lah ban iasaid/kyrpad. Kata ka bym lah ban long. Dei tang uba don jingim bad uba don ka bor pyrkhata uba lah ban iasaid ne kyrpad na ka bynta kiwei pat.

### **U Mynsiem Bakhuid kum U Nongpyntngen/ Nongiarap**

1 Ioannis 14:16 Nga (Jisu) ruh, ngan duwai ia U Kpa, te Un ai ha phi ia uwei pat u Nongpyntngen... U Mynsiem ka jingshisha kein.

Note: Ngi iohi ia ka Trinity ha kine ki 2 tylli ki dkhot.

2 Ioannis 14:26 Hynrei uta u Nongpyntngen, U Mynsiem Bakhuid, ia Uba Uta U Kpa Un phah ha ka kyrteng jong nga (Jisu), Uta kein Un hikai ia phi ia kiei kiei baroh kiba nga la ong ha phi.

Note: Ngi iohi biang da kaba shai ia ka Trinity hangne. Hangne ka iathuh ba U Blei Uba U Kpa Un phah ia u Nongpyntngen, U Mynsiem lada U Mynsiem Bakhuid U long hi U Blei (Uba U Kpa) kumno Un phah ialade? Sa kawei, hatu yn lah ban phah ia kaei kaei ka bym don jingim ne bor pyrkhata pyrdain?

Nangta, hangne ka ong, ba U Mynsiem Bakhuid Un hikai. Kumno kata ka bor (power) bad ka jingdon (presence) U Blei ka bym don jingim kan lah ban hikai?

3 Ioannis 16:7 Hynrei nga iathuh ia kaba shisha ha phi, ka myntoi ia nga ba ngan leit noh; namar lada ngam leit noh, Uta u Nongpyntngen Un ym wan ha phi; hynrei lada nga leit noh, ngan phah ia u ha phi.

Note: "Lada ngam leit noh Uta u Nongpyntngen Un ym wan ha phi." Hangne ngi iohi ba Uta u Nongpyntngen (U Mynsiem Bakhuid) bad U Jisu kim ia long ujuh. Ka pyni ba ki don ar ki personality hangne.

Lada U Mynsiem Bakhuid U long tang ka bor (power) bad jingdon (presence) U Blei, hatu U Blei (Kpa) lane U Jisu Un lah ban phah ialade? Ngi phah ia kiwei ym ialade.

4. Ioannis 16:8- "Te ynda U la wan ma U, Un pynkynduh ia ka pyrthei..."

Note: Hato kaei kaei ka bym don jingim ne bor pyrkhath pyrdain kan lah ban pynkynduh?

5. Ioannis 16:3- Hynrei ynda la wan ma U, U Mynsiem ka jingshisha kein, un ialam sha ka jingshisha baroh, namar un ym kren na lade...

Note: Ka pyni ia ka jinglong person U Mynsiem Bakhuid. Lada um don jingim ne bor pyrkhath pyrdain kumno un lah ban "wan" ban "ialam" bad ban "kren?"

6. Ioannis 16:14 - Un (U Mynsiem Bakhuid) pyndon burom ia nga...

Note: Lada U Mynsiem Bakhuid U long U Khrist hi, kumno un pyndonburom ialade? Ngim ju pyndonburom ialade, ki dei kiwei ki ban pyndonburom ia ngi.

### **U BLEI UN KYRKHU IA PHI**